

**Radunanza generala dal CAS Engiadina Bassa, ils 24 avrigl 2013
Il hotel Alvetern ad Ardez**

Tractandas

1. Protocol da l'ultima radunanza dals 30 avrigl 2012 a Zernez
2. Rapport dal president
3. Rapports dals differents schefs
4. Rendaquint 2012 e rapport dals revisuors
5. Contribuziun annuala da commembranza
6. Tschernas da suprastanza
7. Onurificaziuns dals veterans
8. Infuormaziun e varia

Nos president Heinz Gross driva la radunanza generala a las 20.00 h e po salüdar a 52 commembers/bras. Heinz da in spezial ün cordial salüd a noss commembers d'onur Irma e Jachen Egler ed eir a noss veterans e giubilar. Jon Peder Strimer, il capo dad Ardez porta il salüd da la suprastanza cumünala e da eir da sia vart ün cordial bainvgnü a tuot la radunanza generala in seis cumün.

Divers commembers/bras s'han laschè s-chüsar in scrit o a bocca. Sco dombravuschs funcziunan Daniel Pitsch e Fritz Felix.

1. Protocol da l'ultima radunanza generala dals 30 avrigl 2012 a Zernez

Il protocol vain preelet da l'actuara ed approvà cun applaus.

2. Rapport dal president

Quist on vain festagià il giubileum da 150 ons CAS central. Ils 19 avrigl 1863 han 35 signuors da la bassa fondà il club alpin cun l'admoniziun da nu surlaschar la conquista da las alps a quels dals pajais esters. Tenor las retscherschas da Heinz saja nossa secziun daspö il 1892, quai vuol dir cha a partir da quel temp saja ils prüms protocols. Ils CAS s'ha svilupà sün 111 secziuns cun s-chars 140'000 commembers (il plü grond club da tuot la Svizra). Nossa secziun ha s-chars 940 commembers ed es l'unica secziun s-chetta rumantscha. Il CAS es ün club modern, cun raduond 35% duonnas, ils commembers chi comunicheschan via Facebook, cun 152 chamonnas ecc üna têt differenza cun il cumanzamaint avant 150 ons!

Sguard inavo sül 2012:

Sco prüm act in sia nouva carica sco president da nossa secziun ha Heinz pudü tour in consegna l'elecziun da Chasper Alexander Felix sco nouv president da la "Alpine Rettung Schweiz".

Las infuormaziuns a regard l'Alp Sprella survgnina suot la tractanda no 8.

A partir da l'invern passà saja per tuot las chamonnas ün nouv reglamaint d'annulaziun chi vala per tuot la Svizra. Quist nouv reglamaint stuvev s'ligerir als guardgia chamonnas las discussiuns a regard reservaziuns chi nu vegnan tgnüdas aint.

Il CAS central ha elavurà ün nouv concept per las sarineras. Tenor quel concept nun es la sarinera in Val Tuoi plü à jour e sto gnir refatta. Ün tema chi sarà tractandà quist on chi vain.

Ün tema chi da eir rumpatesta als da Berna es la diminuaziun dal fondo da renovaziun per las chamonnas. Our da quist fondo gnivan sustgnüdas renovaziun per las chamonnas, per ch'ellas sajan adattadas als giavüschs e pretaisas ed al temp dad hozindi.

Nossa secziun ha üna nouva pagina d'internet (Nicolo tilla preschainta cuortamaing davo la radunanza). Heinz appellescha a tuot ils participants da las gitas da manar inavo fotografias e tillas metter illura sün nossa pagina.

Eir nossa secziun spordscha üna occurenza in connex cun il giubileum da 150 ons CAS central. Da guadagnar daja ün'eivna sco guardgia chamonna sülla Linard.

Ün tema chi ha eir dat da discuter illa suprastanza sun stats ils gös olimpics previs per il Grischun. Il tema es gnü discutà fich contravers causa ch'al CAS sta aint per perdüranza da la natüra pero voul eir promover il far sport.

Sguard inavant:

Sco nouv commember dal cussagl da fundaziun dal ARS (Alpine Rettung Schweiz) propuona nossa secziun insembel cun tschellas secziuns dal Grischun a Pius Furger (anterior president da la secziun Piz Platta). La votumaziun tras las secziuns Svizzras ha lö ad Interlaken in gün 2013.

Ils 4 october 2013 ha lö la festa da finischiun in connex cun 150 ons CAS a Puntraschigna. Previs es üna discussiun al podi cun ils temas "natüra, alpinissem e turissem". L'occurenza es averta per il public e Gianna Rauch piglia gugent incunter las annunzchas.

La suprastanza es landervia da refar ils statüts da nossa secziun. Quels gnaran preschentats quist on chi vain.

Ün cordial ingrazchamaint va a tuot las personas chi as mettan a disposiziun in ün o l'oter möd per nossa secziun. Grazcha fich al team da redacziun, a tuot ils manaders da gitas, als coachs dal g+s, als spezialists da salvamaint, als respunsabels da las chamonnas ed a tuot ils voluntaris ed impustüt als collegas da suprastanza chi s'ingaschan cun corp ed orma.

Il rapport dal president vain approvà cun applaus.

3. Rapports dals differents schefs

3.1 Schef da salvamaint

Jöri Felix rapportescha in cuorts plets sur da sia lavur sco schef da salvamaint. Dürant l'on scuors nun es stat il salvamaint usche dovrà, pero duos gronds cas tils han listess dat magari blera lavur.

3.2 Schef da gitas

Il nomer da gitas es gnü augmentà e no vain pudü preschentar ün program atractiv tant da stà sco eir d'inviern.

L'inviern passà vaina stuvü annular duos gitas, tuot tschellas sun gnüdas manadas tras cun üna media dad 8 participants/antas cun bellas e bunas relaziuns da naiv.

Eir las gitas da la stà passada sun tuotas gnüdas manadas tras cun üna buna partecipaziun e tuot adüna sainza accidaints.

No vain nouv manaders da gitas chi han absolt eir ils cuors toccants: Jachen Andri Gisep, Roman Luzi e Not Armon Buchli.

3.3 Schef OJ

Tumasch à Porta ingrazcha a tuots ils agüdants chi s'ingaschan in ün o l'otra maniera per l'OJ. Ün sincer ingrazchamaint va a Jachen Andri Planta ed a tuot ils manaders.

Cun Rut ed Andri Janett vaina eir quia duos novs manaders chi sustegnan a Tumasch.

L'eivna da prümavaira d'eira eir l'on passà il hit ed ils uffants han giodü la cumpagnia, il rampignar ed eir la sairada sü Vastur.

Puchadamaing es ida inavo la partecipaziun l'inviern passà. Ouramai sun las sportas d'inviern fich vastas.

Ad Andri Poo ün grazcha fichun per seis ingaschamaint sco coach dal g+s (giuventüna + sport). El ha surdat sia carica a Chasper Buchli.

3.4 Schef da chamonnas

Duri Roner rapportescha sur da sia lavur sco schef da chamonnas.

Chamonna Linard:

A tuot ils guardgia chamonnas da la Linard pertocca ün sincer grazcha fichun per la buna ed instancabla lavur. Sülla chamonna Linard vaina impustüt d'utuon adüna darcheu il problem cun l'aua quasi na existenta per la turbina. No stuvain chattar üna soluziun. Tras las bunas colliaziuns spezialas da Sepp Erni vaina pudü organisar il helicopter da militar per il transport da laina.

Chamonna Tuoi:

Il tet ha subi ün don da naiv d'ürant l'inviern 2012. Quel es gnü pajà da la sgüranza. Pernottaziuns vaina gnü 500 daplü co l'on avant, il schmerdsch pero s'ha augmantà be levmaing.

Chamonna Lischana:

No vain installà ün nouv generatur. Cun 250 pernottaziuns daplü es restà il schmerdsch ca. sco l'on avant. Ils 13 e 14 da lügl daja üna gita davent da la Lischana. In quist connex daja lavur cumöna per metter ad ir ün nouv bügl davant la chamonna cun lingias ecc.

3.5. actuara

Cun la data dad hoz sun inscrit 941 commembers/bras e la mità da quels sun duonnas! Aint il cudeschin as chatta tuot las entradas (68 personas) e tuot las sortidas (26 personas) da nossa secziun cun noms.

Ils rapports vegnan fats bun cun applaus!

4. Rendaquint 2012 e rapport dals revisuors

Il rendaquint è'l rapport dals revisuors sun publichats aint illa gazettina. Il quint da gestiun 2012 muossa ün vanz da sfr 194.75. La facultà netta als 31.12.2012 s'augmainta sün sfr 202'860.42. Andri declera il rendaquint ed eir il quint da gestiun.

No vain pudü far amortisaziuns ill'otezza da sfr. 50'000.-- sparti sü per la chamonna Tuoi e Lischana chi sün aint cun sfr. 318'000.-- e sfr. 322'000.--. L'impraist dal stadi vaina pudü diminuir per sfr. 18'500.-- sün nouv sfr. 37'000.--.

Ils revisuors da quint ingrazchan in lur rapport al chaschier per sia gronda lavur, a Jöri Felix per manar la chascha da salvamaint ed ad Andri Poo, nouv a partir da l'utuon passà a Chasper Buchli per lur sustegn culla chascha dal g+s. Not Armon Willy e Barbla Bonifazi han controllà las differentas chaschas e contabilitats e propuonan acceptaziun dal quint 2012.

Il rendaquint 2012 vain acceptà cun unanimità da vuschs e la radunanza generala dà discharg a la suprastanza.

5. Contribuziun annuala da commemoranza

Per la contribuziun annuala dal 2013 propuona la suprastanza il seguaint sco fin qua:

frs. 28.-- l'on per singuls commembers
frs. 56.-- l'on per famiglias
frs. 15.-- l'on per giuvenils in famiglias na commembras

La radunanza generala fa bun quista proposta.

6. Tschernas: demischiunà ha l'actuara Corsina Feuerstein

Daspö il 2004 es Corsina actuara e respunsabla per ils commembers. Ella ha dat aint sia demischiun. Adonta da differentas dumondas nun esa stat pussibel da chattar ün/a successur/a. Il post dad actuar/a resta vacant e la suprastanza sperescha da pudair preschentar per la prossma radunanaza üna soluziun. La lavur da commembers (annunzchas etc.) fa Corsina invant fin chi es chattà üna successiun.

Cun ün bun, ün applaus ed ün bel püschel fluors piglia la radunanza cumgià da Corsina.

7. Onurificaziun dals veterans

Onurificaziuns vaina differentas quist on:

25 ons commembers sun: Michael Spinnler da Zufikon, Babina Planta da Sent, Mia Mathis da Scuol, Marianne Graf da Riehen, Fritz Felix da Susch, Anna Ursina e Claudio Taisch da Zernez, Ludwig Treitinger dad Absam (AT), Heidi Cuonz da Lavin, Evar Zanetti da Scuol e Josef Erni da Sent.

40 ons commembers es: Georg Buchli da Sent

50 ons commembers es: Conradin Arquint da Scuol

Il president surdà a tuot ils veterans manzunats i'l rapport üna medaglia resp. ün diplom e tils ingrazcha fich per lur gronda fidelità.

8. Infuormaziuns e varia

Gianna Rauch rapportescha cuortamaing sur l'andamaint da l'Alp Sprella. Per gnir incunter als recurrents vaina fat differents müdamaints vi dal proget uriund. Ils puncts importants sun:

- damain lets
- strichà la colliaziun tanter la teja e la stalla
- be amo avert d'ürant la stà

No stuvain spettar gio la nouva ledscha da fabrica da la Val Müstair chi va in vigur sperain per quista stà. Pür lura pudaina inoltrar la nouva e surelavurada dumonda da fabrica. Tenor l'uffizi dal Chantun vaina buna schanza da pudair proseguir cun nos proget. Pero ils recuors nu sun amo evas. Ils cuots per surelavurar il proget sun gnüts pajats dal Chantun.

Avant 10 ons vaiva Georg Buchli scrit üna charta in connex cun la senda da Glims pero mai survgni üna resposta. El propuona da far daplü recloma per quella senda per augmentar las frequenzas. La chamonna Linard es insoma simpel da raggiundscher causa la sporta da taxi fin sü Plan da bügl.

Christina Gregori dumonda davo, perche cha'l grond rapport sur da persunalitats da nossa secziun saja in tudais-ch. Es quai stat üna decisiun illa suprastanza o dals respunsabels scripturs? Ella apellescha da mantgnair il rumatsch in nossa secziun s-chetta rumantscha!

Fritz Felix manaja cha nos statüts novs previs per l'on chi vain sun da preverer in lingua rumantscha, vegnan tramis a Berna per dar l'ok. Els da Berna stuvesan far svesa la traducziun e quella nu das-cha cuostair inguotta a nossa secziun.

Roman Gross ingrazcha a Not Buchli per la bellischma eivna da gitas il Ötztal ed a tuot la cumpagnia.

Irma Egler ingrazcha a Lüzza Rauch e Jon Poo Werro per las bellas gitas da seniors chi han üna bella partecipaziun regulara e sun statts sainza accidaints.

Irma Egler fa la proposta da scriver almain üna jada l'on ün artichel per rumantsch per Las Alps, per cha eir nossa lingua saja preschainta.

Nicolo Pitsch preschainta nossa nouva pagina d'internet. Quella as poja chattar suot www.alpinist.ch. El apellescha a tuot ils partecipants da gitas da manar inavo fotografias e/o cuorts rapports per metter sülla nouva pagina e tilla far gnir tras quai plü interessanta. Grazcha fichun Nicolo ed ad Notarmon Buchi per la gronda lavur cun nossa pagina.

Il president serra la radunanaza a las 22.10 h e giavüscha a tuots ün bun arriv a chasa.

Davo la part uffiziala surdà Heinz il pled a Christina ed Armon chi muossan fotografias impreschiunantas da Norvegia, ingio chi sun stats d'ürant ün'eivna da skis cun Christian Wittwer.

Scuol, ils 03 lügl 2013

Per il protocol:

Corsina Feuerstein Betschart
actudara scadenta

Heinz Gross
president